

## kā-isinākwahk mitēhihk

āskaw mitēh wī-pāscipēw  
kipahikanihk ohci  
ēkosi ta-iskipēk  
itē kā-sīhtāskikanēt.

ēkospīhk ūma  
piko ta-pimohtēhk  
anita 'miywāsin' mēskanāsihk,  
ahpō 'oskana' maskotēhkānihk.  
nānitaw itē ka-nitohtāhcik  
apisci-kāhkākīsak, wāskahikani-piyēsīsak,  
niskak ēkwa mīna omīmīwak.  
piko ta-wāpahkēhk ē-pimwēwēstiniyik  
mēkwāc kā-osāwinākosicik  
piyēsīsak pāh-pakaski-wāpahtahisowak.  
piko ta-wāpahkēhk  
ē-pē-ati-kaskitēwaskwaniyik nisihkāc  
nayēwaci-kīsikohk, piko ta-miyāhtamihk  
askiy itē kā-kimiwaniyik.

kinitawēyihtēnānaw kāmwātisiwin maskotēhkānihk  
ta-wānaskēyahk, ta-wāpahkēyahk pītos-āyak  
ē-sakicihcēnitocik, ta-pāh-pēhtamahk  
pāh-pahki otācimowinisiwāwa,  
opāhpiwiniwāw ahpō cī omātowiniwāw.  
ta-wīci-nīmāsimāyahkok kiwāhkōmākaninawak,  
māskōc ta-isi-wēpinamawāyahkok omīmīwak  
pīsimwāpikwaniy kiscikānisa ahpō pahkwēsikanisa.

nimāmitonēyimāwak aniki kā-osāmēyaticik  
ē-papāmohtēcik asinīhkān-ōtēnāhk  
itē kā-sākamoniyiki miyoskamiwaskosa  
itē kā-pāstipayiyiki.  
itē kā-kipahikāsoyit piyēsīsa  
wāsakāpawīstākwak ahcahkawak  
kā-kwētawēyihtahkik pikwaci-kīkwāsa.

kēyāpic māka nipikitinikawin ta-miyāhtamān  
mistimini-wāpikwaniya, osāwāsihkāni-wāpikwaniya

nīpāmāyāci-wāpikwaniya, ēkwa mīna sihta ēkwa minahik,  
ōki kayās-āyak  
ē-yēhyēstamākoyahkok misiwēskamik.

ōma ninitawēyihtamawāwak aniki kā-āhkwanacik opasakwāpiwināniwāhk  
kā-āhpīhtisicik otēhiwāhk, kā-kipohtawakēcik.  
ninitawēyimāwak kā-asiskīwicik maskasiyak  
ta-māmawōhkamātocik mitēh ēkwa ahcahk,  
ēkosi ta-kiskisiyahk kahkiyaw ē-māwasakonāyahkok  
asinīsisak. ēkonik asinīwipayihcikēwinisak  
kā-akwamohisocik kitēhināhk isi.  
āskaw ēwako kimiskēnaw  
ē-ma-mostohtēyahk  
sāpo maskotēhkānihk.

© Louise B. Halfé – Sky Dancer

Poète officielle du Parlement

Traduction : © Jean Okimāsis et Arok Wolvengrey avec Louise B. Halfé – Sky Dancer